

Na treningu Tuzla Cityja Starčević forsirao ofanzivnu igru (Foto)

Igrači novog premijerligaša Tuzla Cityja punom parom pripremaju se za svoj debi u najkvalitetnijoj bh. nogometnoj ligi.

Večeras su na stadionu u Simin Hanu odradili veoma raznovrstan, naporan, ali zanimljiv trening.

S golmanima Nevresom Fejzićem i Benjaminom Čolakovićem radio je Mirsad Dedić, dok je ostale igrače "kroz sito i rešet" tjerao šef struke Slobodan Starčević uz asistenciju prvog pomoćnika Mensura Dedića.

– Prezadovoljan sam dosadašnjim tokom priprema, ako izostavim činjenicu da nam se teško povrijedio vrlo bitan igrač, Aleksandar Milaković, koji uskoro mora na operaciju – izjavio je za TuzlaLIVE.ba šef stručnog štaba Tuzla Cityja Slobodan Starčević.

Poseban program, uglavnom trkački, imali su golman Adis Nurković, te Joco Stokić i Edin Murga.

Mlađi tuzlanski premijerligaš u 1. kolu gostuje u Širokom Brijegu, a da se ne idu braniti pokazuje i detalj s treninga u kojem je novi „coach“, bivši trener Krupe, forsirao brzu i ofanzivnu igru, uz nemilosrdno "torpedovanje" Fejzića na jednom голу, te Čolakovića na suprotnoj strani skraćenog igrališta.

Starčević će svoje igrače na put u Hercegovinu povesti dan prije utakmice kako bi se što odmorniji suprostavili Širokobriježanima.

Tuzla City je tokom priprema odigrao pet utakmica od kojih je četiri riješio u svoju korist.

Slavili su protiv Zvijezde 09 (3:0), HNK Gorice (2:0), Petrolula (Rumunija 2:1) i Čelika (2:0), a jedini poraz doživjeli su u susretu sa ekipom Krškog (2:0).

Utakmica Široki Brijeg – Tuzla City igra se u nedjelju na stadionu Pecara od 20.30 sati.(mp, Foto: Miroslav Petrović)

Date: 18-07-2018